

Zulaika Geerman: ALEGRE, TALENTOSO, Y CU HOPI RIQUEZA SPIRITUAL!



Dia 13 di december ultimo Sala di Cas di Cultura tabata basta yen. Muchila Creativo a cera cu broche di oro su trimestre di curso, y e participantenan a duna un tremendo show. "Aruba Multicultural", cu tabata un module hopi bon presenta pa alumnonan di Colegio Paso Sigur a worde incorpora na Muchila Creativo, y asina e publico presente a disfruta di un tremendo espectáculo. Sin duda, un hobencita a capta atencion masha hopi mes. Zulaika Geerman a sali riba escenario pa presenta su programa via CSS "Vision Cultural" a traves di cual e publico a cera conoci cu "Aruba Multicultural". Zulaika ta un hoben activo,

dinamico, alegre, y cu hopi talento pa actua dilanti publico na un manera asina natural, y cu tanto carisma, cu for di su prome presentacion riba stage el a "cumpra" e publico su curazon. Durante pause, algun persona a cerca Seccion Hubentud den Movecion, cu a cubri e evento, cu e sugerencia pa entrevista e hobencita aki. Awe, nos ta cumpli cu e deseo aki. Zulaika Geerman ta ex-alumno di Maria School unda el a haci su enseñanza basico y di Colegio San Antonio-ETAO. Pues el a lanta na Santa Cruz, aunque actualmente e ta biba na Dakota. For di chiquito su soño tabata pa traha den estrecho relacion cu e ser humano, special-

mente cu mucha, pa asina envolver su mes cu e parti social di nos comunidad.

Esaki ta e motibo pa cual el a opta pa drenta Colegio Paso Sigur den e ramo di Servicio Social.

"For di chiquito mi ta den e organizacion AJMC na Santa Cruz cu ta traha cu mucha di 6 pa 18 aña di edad. Ainda mi ta aden y actualmente mi ta lider. Aunque ultimamente e organizacion no ta mucho activo, tempo cu tabata mas activo nos a organiza actividadnan manera speurtocht, festival di canto den cual mi mes a participa dos biaha, nos tabata tin show na Cas di Cultura y hopi otro cos cu nos a haci".

Zulaika tin un voz precioso. Esaki ta un don natural cu Dios a dun'e manera e mes ta bisa, y e ta integrante di e Coro Voz Hubenil Santa Cruz den cual e tin 10 aña caba ta canta.

Ademas e ta toca guitarra masha bunita mes.

DON PA COMUNICA CU OTRO

Ademas e hobencita aki tin un talento tremendo pa fungi como maestro di ceremonia.

Seccion Hubentud den Movecion a punte si e no tin pensa di drenta den e ramo di comunicacion social, periodismo, sea den television of radio ya cu e tin dominio di voz y di su persona dilanti publico.

"Bon, esey ta un posibilidad cu semper mi a gusta, pero mi a lague cay debi na mi estudio actual. Mi ta gusta presenta y actua, y mi ta pensa cu mi mester sigui desaroya e parti aki, dentro di mi carera di Servicio Social". Zulaika no a defini ainda kico e ta bay haci ora e obtene su diploma na E.P.I.

"Hopi hende ta bisa mi pa mi sigui mas leu, pa busca hende pa yuda mi drenta den comunicacion social. Si bo wak bon un medio di prensa of television tambe ta un parti social y por bien lo mi por scoge e direccion aki, por ta na Hulanda. Pero ainda mi no ta planeando mi futuro asina leu".

Zulaika ta sinti hopi contento como alumno di Colegio Paso Sigur unda e tin un cantidad grandi di amiganan.

"Mi compañeronan di school ta duna mi hopi sosten y nos tur ta yuda otro".

CUALIDAD DI LIDER

Zulaika Geerman riba su mes tin un profundo cualidad di lider.

"Enberdad hopi hende ta bisa mi asina. Door cu mi ta den diferente organizacion hopi biaha nan ta scoge ami pa ta lider di algo. Den clas tambe nan ta mira mi como un lider. Mi ta kere cu ta un don cu enberdad mi a haya di Dios y mi ta gradici na dje y lo mi sigui traha cune".

Zulaika tin un caracter sumamente alegre, y unda cu e ta bay e ta trece e nota di alegria, picardia, y di travesura.

Na dado momento el a pensa di bira Juffrouw di School, pero cu tempo e deseo aki a bira menos aunque semper el a keda cu su intencion di traha cu hobennan.

HESUS DEN SU BIDA

Zulaika ta forma parti di e grupo hubenil carismatico "Mesias".

"Nos ta un grupo bastante grandi. Mi mes tin algun tempo cu no ta bay, debi na estudio, pero awor cu nos a cuminsa un aña nobo lo mi bolbe participa. Jesus ta forma un parti hopi importante den mi bida, pero mi ta kere cu esaki ta depende den cada hoben con nan a worde lanta na cas. Como hoben mi ta kere cu e parti spiritual ta esencial. Hiba un bida spiritual rico no ta "laf" pero ta hopi bunita mes. Mi ta kere cu si Dios lo no a duna nos bida, nos no tabata tey pa cumpli cu nos mision. Si e no a duna nos un don pa cumpli cu esey nos no tabata aki awor. Mi ta kere cu cada un di nos a nace cu un meta pa traha riba dje".

Jesus ta un forza grandi rond di humanidad en general y nos hubentud en particular. Bal la pena pa conoc'e, stim'e y traha pa cumpli cu e meta cu el a pone cada un di nos su dilanti. Angelique, Faridi, Zulaika y Lilliana, ta e hobennan cu nos por mira riba potret, cu ta cuatro amiga inseparable na school y na tur caminda unda cu nan por topa cu otro. Zulaika ta conta cu hopi mas amiga mes pega cune, no solamente na school, pero, entre

otro, den Grupo Mesias y den Coro Hubenil Santa Cruz.

Zulaika ta un tremendo ser humano cu ta duna hopi di su mes y ta un bunita ehemplo di un hoben cu ta cana riba e caminda corecto y ta plenamente feliz.



**PROFAR'S
EDUCATION
INSTITUTE**

a division of Profar Consultancy N.V.
Director Drs. R. H. Michel

PROGRAMANAN PA HUBENTUD:

GUIA COMPLETO Y PROFESIONAL

DESPUES DI SKOL
pa alumnonan di
MAVO/ HAVO/ VWO
> Guia cu Huiswerk
> Apoyo Individual
> Atencion Special pa
pw/cp/so/y examen
> Metodonan di Studia

Cambia bo estilo di studion
y mehora bo resultadonan escolar !!

TESTNAN SICOLOGICO PA YUDA DETERMINA BO:

Vakkenpakket
Futuro Estudio/ Profesión
Personalidad y Carácter
Capacidadnan escolar

Escohe debidamente cu
testnan profesional !!

COUNSELING Y AYU- DO PROFESIONAL PA HUBENTUD entre otro:

Tension y Depresividad
Miedo di faya pa examen
Problemanan familiar, escolar y personal

No warda te ta mucho laat.
Papia cu un profesional y
solucionas bo problemanan!!

Pa mas informacion:

YAMA TEL 27920

entre 10 am y 8 pm
Lucille Michel-Celaire, mng.dir.

Telefonan di
DIARIO

826747

**Fax:
828551**



**PA GENERACION
DI FUTURO**